

四庫全書

集部

欽定四庫全書

集部

浮山集卷二

詳校官庶吉士

臣柳邁祖

主事

臣呂雲棟覆勘

謄錄監生

臣黃

鐘

謄錄監生

臣松承羣

欽定四庫全書

集部四

提要

浮山集十卷

別集類三

宋

臣等謹案浮山集十卷宋仲并撰并字彌性江都人宋史藝文志載并浮山集十六卷而不為立傳其事蹟遂無所考惟周必大平園集有所作并集序稱并以紹興壬子擢進士第甲寅以丞相朱勝非等論薦改今秩尋補

外去後三年丁巳復以張浚薦召至闕為秦
檜所沮改倅京口自是閒退者二十年孝宗
即位擢光祿丞出知蘄州所紀歷官本末頗
詳然考集中謝宰相啟有黷序初除語則嘗
為教官又原弊錄序自稱監臨猥局則嘗為
監場官又多與平江淮西南安建康湖州諸
守臣代作表啟則嘗歷佐諸郡而必大序俱
未之及殆以其無闕出處畧之也必大又稱

并力排王氏之說惟孔孟是師其初任京秩
時王居正所草制詞亦有學知是非邪正之
褒而陳振孫書錄解題乃稱其官湖倅時為
籍中妓作生朝青詞坐是謫官與其素行不
相類頗不可解考集中陳情啟有旁觀下石
仇家謗傷之語意其即指是事歟又集中有
回孟郡王姻禮書郡王隆祐太后之姪孟忠
厚也宋史外戚傳稱忠厚與秦檜為僚壻而

檜實陰忌之又稱檜當國親姻攀援以進忠
厚獨與忤王明清揮麈錄稱吳棫為忠厚草
表因忤秦檜謫判泉州然則并之見惡於檜
殆以孟氏姻黨之故竟以微罪坐廢也其古
文頗高簡有法度四六能以散行為排偶尤
歐蘇之遺詩亦清雋拔俗王應麟困學紀聞
嘗引所作咏韋執誼不看嶺南圖詩政恐崖
州如有北卻應未肯受讒夫二句以為誅奸

諛之蕭芥然其詞淺露殊不盡并之所長應
麟蓋偶拈及之以為并詩止此則非矣據周
必大序其集乃并外孫南安太守孟猷所編
舊本久佚今採永樂大典所載排次訂正輯
成十卷乾隆四十六年九月恭校上

總纂官

臣紀昀臣陸錫熊臣孫士毅

總校官臣陸費墀

欽定四庫全書

浮山集
提要

浮山集原序

江都仲并彌性自少卓犖不羣潛心學問力排王氏一偏之說惟六藝孔孟是師筆勢翩翩雋聲籍甚紹興壬子擢進士第高宗方汲汲人才歲在甲寅丞相勝非執政松年與一二侍從相繼薦對上一見褒賞特改京秩詞臣王居正草制云學知是非邪正庶幾孔子所謂可與共學者當是時人之期君君之自期皆謂公卿可立致或疑年少資淺宜試以事補外而去後三年丁巳丞

相浚執政復以名聞召至闕而樞密使檜頗不謂然君
即移疾出倅京口自是棲遲閒退者二十年孝宗初元
擢丞光祿晚知蘄州議論材畧既未盡見於用而平生
著述亦多散失外孫南安太守孟猷嗜學好修淵源有
自裒成浮山集十六卷以序見屬予婦家於君有連且
嘗同朝熟其才華故樂為言之夫文體衆矣吟詠情性
莫重於詩仕塗應用莫急牋啟詩也者造意深則辭或
齟齬次韻多則句或牽率君之古律如王良造父馭駿

馬駕輕車有犇軼絕塵之勢其賡險韻如繭抽絲印印
泥愈出愈新送妹長篇孝友慈愛溢於言外殆欲上規
風雅一何盛也其四六叙事雖閎肆而關鍵實密屬對
雖切而非駢儷所能拘最後蘄州謝上表以古文就今
體自成一家凡為國撫民據舊圖新之意無愧前哲此
由學廣聞多非特天才駿發而已其他論時事條利害
深切明白務在可行為莊安常行狀見謂三長雜著題
跋清雅可愛復以餘力出入釋氏遊戲歌詞無不過人

夫其才學如此幸早為君宰所知而不得雍容禁省歌
頌大業其命也夫雖然裕於才者薄於命文士常然獨
君乎哉姑詳著以釋南安凱風寒泉之思云慶元六年
七月旦平園老叟周必大序

欽定四庫全書

浮山集卷一

宋 仲并 撰

五言古詩

早起偶成

晨光起天末微風動林杪披衣初夢回捲書倦清曉隱
几欲無寐百念自憂悄簾瓢舊獨樂樂意今亦少豈但
感時節政欲避煩擾我非斯人徒區區務自了

寒食日歸吳興寄魯山

風雲雖不定日雨亦易乾
殘春猶凜凜助我朝食寒
想見芳野田士女游班班
去者日以踈更為來者歡
青紅間車馬日暮醉墻間

題大明寺詩

招提隱松桂遠在城一隅
我來歲云暮天寒氣象殊
寓目得佳趣百念如滌除
及此齋時鐘簞瓢慰吾臞
文室曦未來香篆沈熏爐
聊施濟勝具未暇學跣趺
緩步大明寺山光佳有餘
郊原自春色物意如相娛
習公四海

士豪氣編虎須邂逅偶傾蓋清遊邀我俱相從得二謝
笑語寄歌呼

送大理金少卿赴闕以老成耆德重于典刑為

韻兼寄呈刑曹徐侍郎

霜餘日初杲遮留人擁道公來春向闌公去秋垂老公
當侍丹墀正人國之寶行行那得留仍視玉堂草

憶昔游成均千言談笑成傑立羣雋上少日騰英聲大
當持荷橐小當登蓬瀛戢翼久不振一旦朝陽鳴

全璧公之歸有識為嗟咨外祠三拜命歷歲艾且耆乘
流與遇坎道在他何知汪汪波萬頃未許兒輩窺

高山列松栢歲寒寧動色顏巷一簞瓢掩關養吾直紛
聲利場時勝時奔北袖手了不關昂然見全德

九重聖端拱慨念人材重澄清鴛鷺行拔尤鋤猥茸輔
郡與畿甸連歲拜殊寵付君天下平民冤自無壅

疇昔公何如盡讀天下書公今復何似未如張與于臯
陶當日語一一皆世模但令犴獄空安用高吾閭

澆風昔未殄，向隅或不免。上心天地心，哀矜用中典。卿
聯慎所付，遂極天下選。議猷聊小試，經綸期一展。
指日公旋登，政席仍樞庭。坐令貧病士，少慰身飄零。問
訊徐夫子，起處秋安寧。兩翁廟堂具，那得長司刑。

錢檢法及代期以詩告別因次其韻

昔年兩岸柳，逢春正依依。扁舟轉河曲，風光隨處宜。彈
指歲云何，秋風橘柚垂。折腰得斗粟，未救臣朔飢。儒宮
一何有，惜哉壯觀聽。采采池中芹，亂葑迷漣漪。蕭條住

槐市庭空蔓草滋丹艘墮煨燼草木含瘡痍永懷千古
人雜佩思報之我乃但便腹未免兒輩嗤斯辰況多艱
每懷廢晨炊疇昔請長纓唾手平龜茲西畧收咸京北
伐空鮮卑坐令王室尊國風無黍離力微不辨此千愁
鎖修眉承惠謝徵官一室投荒陂吳山險可攀吳水清
可窺勝概苦邀予投紱今去遲王孫定偉器尺璧無纖
疵枯槁屢賈勇佳篇仍致師一日不會面悠悠勤我思
大軸挿牙籤細字攻毛錐朝廷羅羣公如君滄海遺勿

學貧賤交自比山林姿誓將友麋鹿終焉寄鋤犁況君
秀眉宇異世元紫芝新詩落我前醉眼眩珠璣言多意
無他戀戀新相知男兒各行役盍簪寧無時期君在歲
寒素心無自違君看千年栢豈憚霜雪欺慎勿倚市門
美貨當自怡懷璧忌暗投按劍古所悲吳門三年淹冲
天在一飛征塗加餐飯秋晚多寒暄求仙豈浪語渺茫
那可期行行快著鞭獻納黃金扉勿作兒女別淚下如
綆縻我方戒多語念念知昨非恨無錦繡段酬君黃絹

辭

七月二十日過王村幾到岸遇和中襲明舟回
相拉宿於陳氏庵中蚊甚盛達旦不能寢

畏暑肩暫息初涼戒我行王村去城市捷帆片時程到
岸纔咫尺兩君笑相迎回棹不自由劇談底裏傾却泊
紅蓮渚支筇叩禪扃闌闌未有此一見心眼清日暮山
蕭然風來竹有聲危亭仍解衣坐久太清生攜枕共席
地醉言強作醒蚊聲喧不寐談餘已牕明他鄉各蓬轉

易散難合并共居雖一溪相望南北城勝處偶同踐輕
去寧無情慙懃拂素壁留詩當題名

奉和陳德召遊惠山見寄三十韻

飛埃喜污人餘事忌掛眼酒浪綠可親山光翠相挽折
腰素非願被面有餘赧從來萬事空此去百念滿恰憶
茲山遊判作經年款駕言隨所如歌筵為君莞洗耳聽
潺湲緩步踏巉巖褰裳跨風磴捫蘿度雲棧未泰豈離
離棗下初纂纂川原供遐矚筍蕨中去覓桃李傾城姿

松杉萬金產雪浪逗冰泉乳花浮玉盃相望一牛鳴不
憚四牡瘡層閣神所宅敗簷我將館心求千佛印手罷
七年板勝槩何時無羈懷自悲潛小院昔徜徉東風未
暄暖夜語聯僧榻晨炊共華饌羊腸一分襟鴈背幾折
簡於今懷舉按過公倦開殘早知玉樹摧不如春思短
塵容久難贖樂事貧益罕佳篇分錦繡和氣回絃管差
肩招隱此下視廣陵散指蹤去路迷加鞭客情懶誅茅
行可卜鼓棹過幾返避喧諧良圖結隣得佳伴萍蓬豈

願餘斗筭未須算荒涼石逕深
踏蹬雲色晚歸鞅那得

遲霜鬢侵韋誕

與德名諸公遊惠山今五年矣死生離
合何事不有吾德輝亦不意永辭泉下

今日讀德名新句慨然久之又念離索之餘
磨唱遂絕勉強和呈迫於韻險不能工也

祝子權以詩見招勉繼其韻

總角嗜學問於心期可收歲月如逝水倏忽二十秋
紛紛何所得俗士難與謀夫子四海士不數韓荊州
摳衣一嘗會頗輕萬戶侯祝子晚傾蓋緩急仍同舟
偉哉廊廟器價高自難酬相從半周星會別嗟何稠
班荆此話

舊落落志益修嗟我聞道晚僅脫兒女憂一斑幸時窺
稍知辨薰蕕執經濫同席得子真良儔安得身為雲相
陪汗漫游茫茫水東注百川皆亂流驚駘飽東芻市者
常易售借問諸夫子為功忌中休此語期同踐此外復
何求

送周元特侍郎守宣城

西風迎公來東風送公去尚欲留朱轡公行不可住無
酒對公傾有懷為公賦夫子文武資亦復廊廟具剛方

仰術業坦夷見襟度青衫試州縣機鋒微已露吾意有
不可萬夫挽不顧翔翔諸公間籍甚當時譽我冠上烏
臺直諫汲長孺風雲千載合冕旒一言寤凜凜議論餘
可使淮南懼天威瞻咫尺政塗去跬步興逸頓言歸解
佩苔溪路湖山聊寄懷詩書尚溫故中外豈不殊進退
自餘裕宣城唇齒邦望公來何暮我飢我顰呻公飯公
覆護舉首望旌戟指期詠襦袴平生觸邪手不難鋤弊
蠹雙溪疊嶂間按堵百無慮坐席豈容溫當饋意久注

獻納念伏蒲謀謨懷借箸行矣股肱良歸作腹心助要
觀今周公聲名三吐哺便當侶夔龍何止冠鵷鷺自念
接門牆連歲忘羈寓鷁首明當飛驥尾何由附幾日復
升堂青天披宿霧過鴈與來魚猶當奉尺素西去無多
程不誦陽關句

和何樞密題楚頌亭韻

山林與鐘鼎各了一世緣千年眉山翁生氣猶凜然菟
裘視陽羨賣劍將老馬此志空泉扃禾黍荒故園尚餘

種橘帖會有異世賢西清廣川公文翰鬱雙全新篇來
西樞句句清可絃廊廟須公歸寧容一壑專九重最深
眷每轉從諫園絕唱今寡和惜哉坡已仙回視楚臣些
並馳爭孰先况復黃絹碑光耀荆溪邊此亭會不磨名
與兩公傳幾株羅瀟湘便覺饒風烟不比濯錦江檀木
須三年行矣涼飈起霜滿千崖巔香霧噴四坐滿引杯
垂蓮

同祝子權遊虎邱

出門迎朝暎入門餞夕陽豈願從吾駟聲名跨楚梁
日聊與君褰裳陟危岡方舟轉河曲薰風度微涼細看
槐柳暗稍覺簷蔔香天高散霞綺雲淨呈天光梵宮占
地勝古木參天長禽鳥亦自得嗚呼聲激昂緩步信攜
筇清流足飛觴乃知聲利役脫去非無方所憐雄麗地
千年隴樹荒石頑尚莓苔劍逝寧光芒自今一瞬息江
山幾興亡我衰漸落寞樂極淚淋浪寄謝同心人無驚
鬢毛黃

志師自通州訪我於儀真因攜之至長蘆留語
數日及其歸也作詩以送之

通州瞿曇師多於雁鷺行吾常愛志僧謂之一鳳凰不
見十五載訪我大江傍留之固未遣載以荊州航相從
三日遊山晚松風長爾我豈其夢嗒然堯桀忘凌晨洗
一鉢束衣還故鄉為子植梧桐何時復來翔

舟過仁王寺因口占一首

平野綠遠近晴山翠縱橫西風今日涼天意濟此行居

士十日病快意身已輕逢寺聊少憩山僧苦相迎豈為
餘事來泉石鍾吾情風生本何意松篁得之清向來城
市口無此笙竽聲坐久百念歇一雨秋意生所恨二三
子無懷可同傾少日戒客氣四十猶未平一事一錯誤
百年幾折肱不如謝公等窮山掩柴扃

鄭漕生辰代幾先作

至公無轍跡萬變歸諸正誰云學則然要在成以性我
公鍾間氣異稟剛且勁一毫不容私心境自澄映超然

是非表燭物眼常淨還將溟渤量一了百川競由來仁
者壽茲理天所命欲知椿齡永視此寬平政桂華弄小
春晚香適再盛年年幾望月影泛盃中聖尚書心如水
遠裔有餘慶

鄭相也

何以繼清風家聲南北鄭

戲李彥平李德邵

人生貴適意自苦良亦癡百年同夢幻富貴安所施我
生世緣薄疲弱不可支紛華豈不佳自覺心已辭歸來
時自笑撫手長嗟咨人生行樂耳勲業知何時兩李近

豪放高懷不少卑謫仙已云歿流風宛在茲平子韻絕
俗豪逸真吾師萬事一粲然不復論成虧邵公藥菴下
操心常苦危易象魯春秋憂樂常相隨端居談利害羌
夷可鞭笞近亦能稍稍笑語隨兒嬉平居如二子廊廟
真所宜人豈不自省何必求著龜漫遊恐未免慎勿差
毫釐世事足反覆紛紛盡如斯錯固不足道誼也亦為
之請復銘座右政可為吾規前言戲之耳未來容可追

七言古詩

元宵微雨十六夜雨止見月

燈火千門競是日出戶黃昏雲抹漆夜光來闇何處投
冷淡行人悵如失明朝風清天動色雲陰初若龜兆坼
須臾白盤升天東相如歸來更全璧

舟行用前韻懷祝子權

楊枝巧作腰支弱不分小桃紅入萼風光向人但嫵媚
客子那知行路惡短篷蕩漾晴波裏取次茶深酒薄薄
所思故人殊未來悲風為我生絕壑塵沙隔年不相見

結鄰空記他時約相看一字不寄將剩有新知豈云樂
眼前俗士敗意耳憶君歲歲空牢落炯炯眉目端可思
月照西廊暮雲廊

建昌守楊吉老得居湖州山間作亭於上名曰
弁輝為長句以記之

白首苕溪幾我鄉青眼弁山如故友誅茅晚歲合巖棲
漂梗一生嗟浪走往往每來每太息去去一步一回首
簷楹之雄誰氏室基堂宜為後人有榮華謬作長久計

蕩盈要以仁誼守室空無人人不問天固遺公公信否
輪奐雅宜鳳池人權輿本自鳳池手付之勲閥可無憾
會與令名俱不朽雅懷卜鄰非卜居囂塵可暫不可久
新亭巖崑城之巔佳致回環天所就與山似有他年約
相嚮每為長者壽碧鮮蒼潤被草木煖翠晴光排戶牖
時復一觴澆磊砢下視羣峯皆培塿乃知韞玉山有輝
更覺看山公不負向來曾試西垣策只今聊綰南豐綬
胷中水鑑極涇渭筆下瑰辭粲瓊玖傾蓋視我平生交

曳裾陪公衆客後喜見成都宅一區恨無負郭田數畝
去住還當慚二老窮獨已復成一叟門前剥啄非他人
我來問字不載酒

陳行之得之因震澤舊居闢小閣面列洞庭山
客有名以尊經者江都仲某為長句以紀之

洞庭之野排千巖陳子卷簾非愛山震澤之流清沒底
陳子凭欄不觀水傑閣橫空一事無終年傳習唯父書
迺翁平時束五傳絕人偉論驚諸儒至寶不受久埋沒

近者私記刊吳都搢紳駢肩快先睹一言價重百車渠
正派源流要有自二難秀發名家駒少小辛勤門戶計
皇天有知子不孤於今三十五經立疊疊雄辯來起予
不但家法傳羣紀經學當與心法俱溪山相對無浪語
寶此一編時卷舒自憐早歲已漂泊迺翁邀我來僧廬
於今墮荒弦誦地當時從容談笑餘契闊死生三十載
萍浮蓬轉常崎嶇子能箕裘萬事足其他得喪爭鉛銖
凜凜清氛端可想神遊髣髴歸來歟

避暑報恩觀

萬家九陌車塵中丹甍碧瓦真人宮回廊小院畧具體
清風爽氣無能同殿簷密有杉松護炎蒸縱酷來無從
偶因謁客凌晨入歸逕往往侵昏鐘道人坐穩知樂否
我生半世猶飄蓬茅簷與此異寒暑分毫不透東南風

外舅莊子尚生辰

荆溪之山環千峯摩空巉絕相爭雄與公萬仞俱壁立
祇有爽氣蟠胸中荆溪之流碧滿野寒光秀色兼天瀉

與公雅量相對清更覺波瀾來筆下高門懸弧此日生
少年揮毫敵兩京當時紫宸初射策玉色臨軒知姓名
一旦橫經向儒苑鳳掖鑾坡去非遠如今高臥尚琳宮
主父嚴徐見何晚向來皂蓋先一州龔黃已往無此流
盱食我皇牧士急未容獨樂林泉幽華堂宴筵春風裏
水綠山青助公喜三槐功就却歸來壽如此山如此水

代人上師垣生辰三首

玉帶金魚袞繡光維垣一旦侍君王垂紳廟堂調玉燭

能使天公時雨暘疇昔干戈歲屢歎於今萬室盈倉箱
天心人意若相語問公何以迴穹蒼天惡人心二三德
公惟一德妙贊襄夜半熟視瓊霄象紫微列宿相熒煌
甘露醴泉不足瑞但欲歲歲占農祥物阜人嬉了無事
斯民擊壤君垂裳時時公亦憩傑閣萬物欣欣春晝長
當時尹躬似今日但欠昭回雲漢章

天寒歲律今崢嶸御街鐘鼓天初明近臣日報君顏喜
問寢慈寧聖主情萬年洩洩融融樂此事無與凡公卿

父老問某何臻此天子用孝公用誠向來瞻雲一萬里
鴈書不到江南城初決和戎蓋公策來歸騶馭人歡迎
九重日奉天下養禁苑蟠桃春自生當時若用他人說
至今未見風塵清前代功臣豈不有未有髣髴公勲名
封人考叔陋籌策區區但捨君之羹

化工作意辦春來斗柄明朝後日回東風先到江南岸
江山濯濯無塵埃靈光葱葱隨處有夜半兩兩明三台
天遣異人為時出要作霖雨澤九垓明堂藉此一柱壯

他山之木皆凡材如今國勢盤泰華向來天步屯雲雷
歲歲年年競是日人人爭欲持壽杯天知調羹付公手
江梅不為他人開長生唯在一清淨別無方丈并蓬萊

沈正卿得男以詩慶之

迺翁壁立千仞餘迺翁摘章錦不如英風雅韻來無盡
川媚還復生明珠華堂寧無侍巾櫛娉婷試問誰家姝
嬋娟深鎖人不見忽驚清曉懸門弧聞是高秋生驥子
充閭喜氣相縈紆大父大母顧之笑迺翁再拜為親娛

公家餘慶得英物渥洼自有名家駒摩頂尚記前生誤
墮地舉手一笑俱夙習如斯定夙寤少小便應傳父書
公卿衮衮自今始行矣家慶端可圖佳辰清樽來賓友
母愛子抱集坐隅臭味芝蘭席上客為公贊喜容歌呼
我衰我倦毋多酌老矣醉倒須人扶留取明年會湯餅
要省徐卿第二雛

五言律詩

詠竹

自結高人伴雅無俗士緣驅之傍城市勁節非所便未
論傲霜雪試欲藏風煙願留舊青眼歲晚相周旋

遊靈巖詩

古寺青楓外平湖暮靄西亂花經雨薄冷蝶趁人低俯
檻留連語聽禽自在啼風光兼客恨樽榼故須攜

移舟晨鼓開泊渚暮鴉盤夾岸柳渾暗橫軒梅半殘最
憐春日薄猶動客衣寒樓外西風急雲湖看湧瀾

舟行再用前韻

一棹苕溪去千門榆火新老來猶是客病起怯逢春儒
館妙人物吟毫泣鬼神平生經濟業勉矣正逢辰
行藏那用卜顰面不重紅又作都城別長懷國士風折
巾從有道斗酒對無功一夢何時續南窓笑語中

覺華山居三首

竟日人聲斷空山一三家猶憐中夜雨不礙曉來花健
飯蔬如肉衝寒酒當茶飛潛各有性貧樂付天涯

舊雨無人到非緣今不來蔬盤春後足經卷粥前開燕

語緣人去禽聲逐夢回勤披頻得句隨量日持杯
倏起郊扉念亟回朝市轅君恩如父母山迥亦乾坤援
筆醉醒語攜筇前後村是非襟度外客至總休論

歲晚泊姑蘇用呂居仁舍人韻二首寄孟信安
斷岸留孤棹層臺聳近城鴈傳他邑信鷗背去年盟幾
片雪多思一枝梅有情何人在樓上吹笛暮寒生

睡穩窻遲曉愁多鬢易秋祗堪浮小艇不擬上西樓無
盡江山景須陪杖屨游一區何日辦孰為我公留

泰興道上人少時頗留意詩律已而徧歷諸
方卒無終歲之寧今垂五十矣自淮鄉過余於
吳興翌日來辭曰道本欲自越趨天童或自溫
趨江心問道於覺了二士覺為橫智了為真歇願聞一言
為書五字詩以送之

芒鞋亦良苦歧路不曾休句律可青眼宗風已白頭舌
端頻自味心外更何求欲寄明年信溫州定越州

韓侍郎

帝礪元勲後熊羆吉夢初祥煙輝戶牖喜色動門閭丙
魏功行致韋平慶有餘願言椿算遠二十考中書

社稷中興際朝廷憶老成我公傳祖烈美譽冠時評相
業光三世官聯且貳卿宸心方眷倚行慶秉鈞衡

送致政節推朱子發歸無錫二首

白髮倦場屋一官初自娛幡然掛章綬遽作卧江湖耆
舊添佳傳都門續故圖會當垂不朽名與惠山俱

雞栖朱伯厚來葉尚多賢吏案儘紛若心田正坦然林

泉誰共樂衣鉢子能傳會有蒲輪到朝煙夕靄邊

送泉州周尚書

閭里推耆德門庭只故居綺羅看富室丹碧銜新廬潤
屋寶非璧滿車家有書功名宜歲晚帶玉綴金魚

常若侍君側寧論去幾程政須懷宿望寧得殿名城執
手欲何語謏公恐不情斯民艱食甚第一勸春耕

得譽今銓筦飛聲自諫垣久知蒙帝可不敢喪吾存切
切道涂喜勤勤指顧言我公今氣貌猶是舊攀轅

別公今夜月恰可一庭方勇往先過建徐行不到漳同
時三郡樂指日四時康勝地豈云遠吾當駢乘黃
身外從紛若冑中固卓然險夷唯故步舒卷只遺編錦
繡文千段珠璣詩幾聯我公今愈健筆力敵中年

送張持國省幹歸山陰三首

臭味張公子生涯類我貧又為兩鄉夢者即一朝紳洗
眼千巖秀抽身肥馬塵他年乘夜雪從子剡溪濱
稠衆相從地無言意已傾余方厭藜藿子肯扣柴荆短

棹起歸暮長亭如別情回頭聽羌管拍拍喚愁生
埋輪賢使者重席老先生一別遽多歲相望無幾程到
家乘暇日為我話深情欲偈相思語昏花字不成

送劉大諫赴漳州四首兼寄建州太守趙左司

海內聲名滿溪頭且寓居曾來非俗客亦愛是吾廬遠
道勤為問平時懶作書郡樓閒極目細看北來魚
南國踰千里西風幾十程凌寒初引道投老試專城貧
賤荷公意分攜如此情書來何處問南浦寄深耕

胄甲漢中壘聲高昔諫垣幾年清議在萬事此心存臨
遣再三意褒嘉數十言疾驅公未可半路趣回轅
安穩甌閩路介居天一方雙旌誰出守八郡莫如漳日
月中天近風霜去路長相知惟白首端冕拜清光

代人上叔母張氏生辰三首

雲漢良辰近秋風一葉初祥光連戶牖喜色動門閭蘋
藻儀無間芝蘭慶有餘仁人宜上壽不必問瀛居

仙閬流芳遠吾門襲慶長萱堂今壽考樞府昔輝光玉

樹諸郎秀金花寵命昌欲知椿算久辟穀有家方
憶昔觀光際溫顏獲屢親獎提煩叔父驚蹇負前人幸
會逢今日飄飄愧此身捧觴陪子姪深覺仲容貧

欽定四庫全書

浮山集卷二

宋 仲并 撰

七言律詩

花前有感兼呈崔相公劉郎中

落花如雪鬢如霜
醉把花看益自傷
少日爲名多檢束
長年無興可顛狂
四時輪轉春常少
百刻支分夜苦長
何事同生壬子歲
老于崔丈及劉郎

余與崔劉年
同獨早衰白

日暮繫舟

新晴不受短篷遮
紫纜持觴一太嗟
柳岸蕭條難駐客
茅簷安穩不如家
百年有幾欲華髮
今日無多已暮鴉
五世鄉關澤未斬
欲歸心折雁行斜

中秋不見月

照人明月故應圓
露冷風清八月天
且看鷺鷥呈妙舞
却愁落雁怯虛弦
裙裾老去真聊爾
色笑公當一粲然
小院不妨今夜雨
人間那有兩嬋娟

四老堂詩

并序

伏承宮使參政大資先生暫茲均逸從容里
閣築圃疏池曾未幾日佳花美竹行列相映
如舊封殖堂曰四老與侍郎郎中提幹朝夕
嘯詠燕息其上門下士有賦詩以獻者某不
得以淺陋爲辭謹課成七字四韻律詩二章
上呈

好上清班冠紫宸
拙身便作最閒身
疎梅茂竹幾多目
曲檻方池隨處春
兩兩脊令聽自好
重重華萼見長新

靈椿一樹婆婆甚穩覆家庭四老人

郡侯頃歲當取寶氏靈椿一樹老丹

桂五枝芳之句榜
公里門曰椿桂云

便勝從來三戟門良金如友玉如昆
天邊鴻雁空千里堂上壘簾共一樽
自昔披榛扶社稷幾人衣錦向邱園
商山曾爲留侯起來作侯家異世孫

題趙有翼叢桂小山

剩引桂枝叢小山驚行姑去自餘閒
人懷崑玉未當價花與萊衣相映斑
佳樹非烟曉蔥鬱幽泉不雨夜潺湲

頓移巖壑山陰道競秀爭流一席間

題吳氏曠遠亭

高人心跡喜雙清曠遠幽亭誰與名
簷外落花仍落絮坐中傾國與傾城
松聲傳壑風初急帆影飄空浪未平
不盡樽中今日醉匆匆輕去得無情

後數年登曠遠亭用前韻再賦

坐客一時人物換此山海內舊知名
華筵爲我歌金縷深院有人來石城
酒浪滿浮春浪碧眉峯淺畫晚峯平

日斜拖轉各回首松竹遶溪知此情

和馮丈遊劉園

槐柳參差覆地陰薰風院落日沉沉酒餘不覺愁何在
花底直疑春可尋江水無情猶北渡淮岑相對漫南音
憑高最動歸與念卧聽疎蟬出晚林

李彥平寄題靜海吏隱堂二詩甚佳因賦一篇
黃綢被底衙聲罷永日庭閒訟不譁案上琴書延好客
江頭風月雜漁家尚看葉令餘波在正索騷人秀句誇

聞道芙蕖紅萬朵遙知不減浣溪花

少陵詩云浣花裏花應笑肯信吾

兼吏
隱名

題李德邵藥庵

綺繻不復尚驕奢經始菟裘謝物華戶外韋衣真隱者
屏間孔雀尚豪家幾年汗簡編禱祀晚歲薰爐負辟邪
誰謂吾廬還有幸卜鄰歸路不相賒

懷抱如公政自嘉衡門那復念京華壯年底事已將老
作戲逢場新有家此去車書應萬里似聞廊廟屏羣邪

時平尤賴安戎策未合幽棲去國賒

再呈德邵

草草茅簷儉異奢坐觀物態盡空華放懷近欲輕千戶
排難何當念兩家壯歲我今成傳癖清時君勿病官邪
他年政恐從名宦回首菟裘恨太賒

祝子權見寄時欲卜居合溪飛雲寺

環堤風漲雨溪深半嶺雲飛一院陰三徑定回俗士駕
百年今見故人心時危天地烽塵滿歲晚江湖客病侵

他日青雲各回首向來黃閤子知音

李孝叔趙有翼趙存中黃子登沈正卿曾同季
有觀梅道場之約僕偶過西山不得陪六客之

未歸讀衆作因繼韻

公皆車馬城南去我向西郊漾小舟人事好乖各回首
吾年如此喜乘流金蘭六客稀時見珠玉一篇無句酬
却數竹林猶少在不妨著我伯倫劉

人嘗戲不能飲者
曰爾爲劉伶乎余

飲少輒醉
聊自戲也

和沈正卿諸公西湖賞梅

一笑相逢水一涯近簷猶記舊相知似矜冰玉非凡骨
終倚雪霜開好枝新綠成陰無幾日微酸著子亦同時
諸公忍袖和羹手空賦西湖處士詩

和耿時舉梅雪二首

百花看盡不如梅故作凌寒殿後開照水憐生句粉處
隔簾抵死透香來未令寄隴音塵斷能覓巡簷句法回
羞殺漫山桃李樹枉教春力費鐫裁

點酥嬌面試初芳琢句真須琢玉郎聊與一枝論雅素
未須千葉間輕黃斜簪髻畔隨人好滿覆樽前借客香
誰引角聲人未寢落梅聲裡看晨粧

舟過吳江謁臈庵翁少留爲賦二詩

住家却學浮家樣橫截江湖疊浪中漫說三高無起日
孰知千古可同風長林蒙霧行平遠層榭攀雲語半空
隄上繫舟何限意匆匆著句未全工

明明窻色極知晚

一作鳥聲驚
夢極知晚

隔岸喧闐祇掩關上下

亭臺烟雨外參差花竹水雲間從多莫剪東南柳勝絕
新增西北山客路十年辛苦裡也容一日及公閒

陪王樞密飯坐間示新詩因次其韻

相業兵韜材總堪君王喜與阿戎談樞機旋轉斗垂北
殿閣遽清風自南主聖端如乾用九公歸當待漢登三
史家莫比唐房杜大似商宗舊學甘

用前韻別寄耿時舉二首

樹猶如此我何堪賴有隨齋可劇談少日聲稱滿中外

幾年詞采秀東南詩壇欲借背城一材館均蒙吐哺三
每見匆匆又分去與公交淡不須甘

方兄於我一無堪閉戶休休口不談憶昔茅簷差傍北
望公花塢恰平南高歌頻舉巨觥一佳唱如聞小雅三
投分素深貧酷似相期同苦亦同甘

沈國錄席上用趙監丞韻

晚來無計障風餐美酒十千價未高成敗兩奩供夜戰
醉醒一斗付春醪流杯指日重修襍琢句如公可命騷

多謝故人樂賓客清歡十倍勝緜袍

杯觴盡醉老仍饗似覺胡床步步高深院清香非柏子
公家重醞勝松醪不須捧觴歌吳曲看即揮毫繼楚騷
未盡餘春早歸去談經當復慰青袍

翌日早起再用昨夕韻呈二丈

柳州老去腹寧饗但喜衡陽紙價高乍暖風光如撲絮
相歡人意似投醪家留溪上久漂泊信斷淮南非驛騷
風浴舞雩那可緩春衣替盡禦寒袍

對雪用曾丈韻呈徐丈

鶴氅偏宜鶴髮翁，戲接筇杖與兒同。
梅梢弄影半窻玉，柳徑吹綿三月風。
擁戶且眠牕未晚，泛舟何向水如空。
陽春便逐新詩到，不待葭灰落嶰筒。

再用前韻答徐聖可

迺翁儒學似文翁，韻句天然無異同。
社稷堂堂推故相，家庭挺挺見遺風。
詞場已擅千軍敵，詩律仍驚萬馬空。
願報瓊瑤無好語，朝來渾欲達空筒。

公方綠髮我成翁猶喜芝蘭臭味同雅奏黃鍾仍大呂
曠懷明月與清風共高卞壁連城價肯使衡茅四壁空
所望茗溪分一曲郵籤日日遡歸筒

繼韻耿時舉寄示往歲梅雪

舊詩新讀更精神雪裡招回未到春俗眼驟驚銀可粉
天心忍用玉如塵漫空柳絮千家到轉眼梅花一夜新
物象區區勞比擬申嚴詩令負前人

懷沈文伯

春服初成屬暮春舞雩那似雪溪濱
遶溪簫鼓誰家子並塞風烟吾故人
好去定無爲客恨臨分猶復念予貧
驅車躍馬平安否雁斷無因消息真

鄭倅德興平江官滿有詩見寄次韻以叙老懷
惜別之意

不奈飛埃點素衣驚霜鬚鬢落全稀
隔簾初聽黃鸝語舉觴那催畫鷁歸
就使淵明頻日醉能爭伯玉幾年非
持竿欲老長城去分我臨流半坐磯

劉乾耀紹原昔同里巷以貧見過愧無以副其
意輒成四韻爲別

舊時阡陌荆榛底十載縱橫豺虎羣絳帳並遊那更得
烏衣羣從斷相聞尚傳是是非非語翻坐奇奇怪怪文
諛墓平生吾豈敢了無一物壽劉君

歸自江陰寄蔣知郡汪簽判

維舟江口未棲鴉急趁飛觴一笑譁旋喜使君傾皂蓋
儘從醉客墮烏紗高城不記人分袂短棹空隨月到家

尚欲趨陪連夜飲東籬客有後開花

和孟嶠之諸公遊虎邱一首

憑高休惜舉觴頻聊結華嚴數面親筇杖止堪扶倦客
蒲團仍得憩閒身雪霜侵鬢巨禁老梅柳迎人俱欲春

後日重來應更好南山排立畫簷新

虎邱欲製一堂席
南山之勝久之未

就近與任夫到試舉此
話任夫深肯之故云

用前韻奉寄孟嶠之

刺喜今年琢句頻仍聞燈火夜相親懸知聳壑昂霄日

不負腰金拖玉身
攻苦詩書如白屋
加鞭辭藻正青春
古來孟氏好兄弟
餘韻未忘今轉新

再用前韻呈陳得之諸公

勲業毋庸攬鏡頻
空餘白髮向人親
未論骨相無三甲
細數年華有六身
泉石相看應笑我
萍蓬不定幾經春
尚須勇往趁晴日
竹外疎梅應斬新

呈彥平

詩人老去倍傷秋
我亦秋來尚黑頭
世事可憐催晚景

皇天未許減羈愁不堪敗菊愁彭澤又見寒雲餞蓐收
旋解鸛裘沾一醉紛紛談話任封侯

用汪彥章內翰諸公韻二首呈信安

勲業皋夔前後身門從羅雀厭蹄輪旌麾亟解江城守
邱壑苦留廊廟人禪觀起侵千嶂曉篇章分與萬家春
要將姓字誇今古史筆何人似獲麟

王門一歲幾經過客裏承顏未厭多詩卷心胷傾錦繡
珍庖盤釜薦麟駝自慚淮海可憐客每費江湖無盡波

玉樹芝蘭爲公喜庭空千丈影婆娑

用方叔韻寄藥庵老人

三徑蕭然欲就荒已將身世兩兼忘紛紜勿用論榮辱
出處真須自弛張憶昔少年親翰墨與公長日付盃觴
如今事事俱無用學道徒能笑子房

和臧陸二祕書

年來疎見驚人句入手遽回如許春幾日異科收異士
百年吾道付吾人執鞭少也嘗求富擊柝老來非爲貧

寄語子雲當自貴儒風元不繫周秦

送鄭公老少卿赴吉州三首

千里能來兩鄭公百年英烈尚遺風

少卿先世嘗守是邦

笙歌少

讓他時勝狂獄應從到日空畫戟行程春色裏郵亭離恨雨聲中不辭遠爲宗風去一瓣香緣六一翁

靜掩巖扉定幾年蘭陵謠誦似新傳

少卿十年前嘗守毘陵

文如

此老仍千騎恩與州人作二天一室蕭然餘樂几平生用處只蒲鞭琵琶休抹三千指公到家家自管絃

不記江城分袂初幾年東北望門閭寒溫一紙無非便
憂病千端自作疎莫忘折梅尋勝事懸知視草報初除
及茲郡舍多閒日早著山中未了書

送高提幹暫過行在詩

老兼貧病怯離羣細雨郵亭曉送君俗韻有誰歌白雪
高標真合致青雲官居盡日勤篇翰相業平時飽見聞
早晚薰風生茂苑肯來樽酒細論文

再和高提幹見寄

昂昂猶想立雞羣
三夜寒窗疊夢君
人物芝蘭晉王謝
篇章黼黻漢卿雲
飄蓬賤跡誰能記
推轂高風今創聞
不敢馳書丞相府
何當收拾與斯文

送平江守蔣宣卿奉祠歸宜興

蔣氏之居堂曰景坡亭曰天遠

二年環堵賴餘波
相和兒童襦袴歌
還復攀轅逢此日
敢忘推轂意如何
十行行矣重徵霸
三徑歸歟暫景坡
旦晚陪公畫橋路
共看天遠夕陽多

送智道者

胷中歷歷幾山川竹杖芒鞋四十年赤手旋爲新活計
白頭猶作舊因緣如如妙境無多事了了真心不礙禪
安坐高峯重點檢未須枕石伴雲眠

次韻答友人四首

頗憶高人相與閒扁舟誰與趣公還杯行欸乃歌聲底
客坐參差帆影間多病扶攜新几杖平生契好舊湖山
未容月轉各分手醉語狂吟下碧灣

久矣忘情豈用閒已看要起亦無還自懷白髮蒼顏客

不墮黃花翠竹間
顧我分為方外友
如公合上道家山
暇時及此頻相過
城北城南潯幾灣

晚矣吾身未乞閒
如公尺一合徵還
高標迴立風塵表
秀句喧傳宇宙間
誰和陽春仍白雪
我知流水與高山
歸歟已熟他時路
直北龍溪一二灣

百年未見一人閒
曾是興嗟唐已還
遺躅有誰高往古
清風元自振中間
我慚官薄當投絃
公比吾家已買山
待得有田歸已暮
何當分我一滄灣

上孟郡王生辰三首

霜餘晴日照堤沙，早晚天墀下白麻。
有吏當筵歌湛露，須公滿斚泛流霞。
篇章況是萬人敵，閥閱相仍百乘家。
落帽何須定重九，探先三日醉黃花。

先門勲業畫圖中，又見麒麟第一功。
吹帽龍山前日事，還珠合浦昔人風。
滿籬何有簡編足，薦牘無心天地公。
誰說維熊契占夢，君王卜處本非熊。

月挂微弦天未霜，初筵遽作十分涼。
飽參平日安心法，

自是長年却老方
詔下龍墀思舊德
名標雁塔看諸郎
慇懃爲採穰潭菊
滿泛西風歲歲觴

外舅莊子尚生辰

祥光昨夜擁冰輪
南國初生瑞世人
倚馬高文追異代
憩棠餘愛在斯民
吟毫剩借江山助
詔墨行頒雨露新
要識漆園非浪語
傳家重看八十春

家聲久矣冠淮東
自喜升堂獲拜公
每看雲烟生筆下
故應丘壑滿胸中
祠公此日家山樂
明府他時社稷功

早晚鋒車下吳會西來猶想及春風

兩州佳譽亞龔黃琳館歸來道益光凜凜松筠非俗韻
詵詵蘭玉見餘芳梅催寒萼春初破月滿冰輪夜未央
景物漸新人不老年年於此醉華觴

平江太守生辰二首

畫戟從來瑞靄浮頓回春意到南州占熊饋鯉呈祥日
拖玉腰金得志秋十載聲名天下最滿懷韜畧古人求
壽觴頻舉公休惜明日催歸侍遽旒

玉笋初辭鷓鴣羣一麾來此振餘芬三槐事業他年看
五袴歌謠隨處聞方丈可量閒日月泰階還赴舊風雲
年年東注松江綠渾欲朝來壽使君

上樞密生辰

家住東南最上游一從東髮侍宸旒文兼鍾阜古今秀
慶與秦淮日夜流盛業行刊千琬琰餘威坐折萬貔貅
竚看拜後恩榮異槐鼎相聯魯與周

謗焰讒波豈易然功成方驗古無前十年險阻忠償國

萬口紛紜誠格天已遣烽消邊障火行看貫朽大農錢
如今聞道持盈業旦旦開陳黼展邊

兒童猶解仰芬芳合綴韓門弟子行久矣飄蓬疎望履
幸哉擁篲即升堂夔龍會合時十載鷗鷺留連天一方
遙願袞衣仍鶴髮年年今日侍君王

胡樞密生辰

秋山淡墨寫千峯輝映門闌氣象中瑞靄亦知人意喜
華觴寧惜醉顏紅莊椿此去幾千歲漢閣他時第一功

試問溪頭閒草木公來無日不春風

借箸從容漢子房平生書奏幾封囊少辭天上風雲會
便覺壺中歲月長調鼎望公非一日草玄與我見諸郎
云何整頓乾坤手漫隔三年鷓鴣行

往歲聲馳淮海濱曾歌紫綬照青春光華萬里古無輩
獻納三朝國有人剩約橫山供勝事細憑芳醕壽斯辰
百年黃閣身猶健重看歸來一幅巾

上平江李侍郎生辰

持橐朝端譽有光
垂弧門左晝初長
功名唾手囊中物
藥石關心肘後方
公念承流當振廩
人歌難老競持觴
壽筵一舉松江渌
便趁追鋒侍帝旁

昔襦今袴雄藩守
佩玉我冠近侍臣
十萬人家等蒙潤
三千風月政當仁
仙姿照坐桃如許
冷艷當簷梅一新
願比秦淮與鍾阜
鬱葱佳氣自長春

代人上師垣生辰

盛世還生瑞世人
東風屈指歲華新
祥烟不斷千山曉

愛日無邊萬國春
鳴玉珥貂扶紫極
橐弓偃革轉洪鈞
我民非敢私爲壽
永作堂堂社稷臣

直把孤忠動帝聰
平生房杜不言功
冲霄鸞鳳謀謨合
遮道豺狼黨與空
韜畧暇時談笑裏
勲名他日畫圖中
中書未數汾陽考
萬有千年似魯公

清風孤映紫宸班
平立伊周伯仲間
幾歲苦心扶國步
今年喜色到天顏
羽書已靜淮西報
翟輅初從塞北還
式廓中原斷無事
從容廊廟有餘閒

已聞鼙鼓靜邊陲初見絲綸寵帝師寰宇一新周禮樂
廣庭重用漢威儀江南江北無他事春後春前更此時
舉醖上公千歲壽賡歌永贊舜無爲

日日衣冠金馬門有誰出力正乾坤來歸季子國人喜
終藉叔孫皇帝尊鳳沼真成逢旦暮龍樓今得問晨昏
欲知餘慶來何似帶礪山河永永存

冠豸英風傳至今于時早已望商霖掛帆鯨浪朝天日
借箸龍墀許國心帝渥存頒廉陞遠邊聲初斷塞垣深

不須更誦烝民句處處兒童盡好音

不用天河洗甲兵只憑直道致昇平三王事業賢臣主
一代師儒難弟兄屢薄賦徭民鼓舞盡除氛翳國清明
休將前古論今日萬古無人敢抗衡

廖成伯奉議生辰

曾聽尊前世綵歌喜聞烟袖舞婆娑

用中建堂名世綵叔祖諫議有小詞

云綵衣長久五世祥烟熏舞袖故云

名駒汗血得夷路老柏凌霜只舊柯

桃李盛時隨地有芝蘭生處近人多春風二月年年事

莫問靈椿歲幾何

提舉生辰

東井遙觀盾日升南風猶入舜絃鳴鵬程九萬豈終息
椿歲八千方再榮平世功名期鳳鳥一時文采應長庚
浮瓜沉李年年事稽首孤南一點明

俞憲生辰代龐幾先作

北固樓前萬頃秋月明風定大江流從來此地多英傑
果有奇才副簡求秀氣一天開夜色威名千里駕潮頭

山川長在人難老應抱文章入相周

淮南持斧功成後
甌粵乘輅喜暫臨
使者英標衣歲繡
近臣新渥帶橫金
三山氣入中秋好
八郡香焚曉霧深
已爲黎元開壽域
可無椿歲慰人心

白氏夫人生日二首

相門苗裔正詵詵
長慶風流幾百春
吉夢忽隨秋日曉
祥光常對月華新
翰林大筆高前古
玉樹諸郎靄後塵
何假捧觴勤頌祝
由來壽考屬仁人

斷機久已傳家訓采藻端然繼國風
庭院爐烟春藹藹門闌瑞氣曉
葱葱遐齡願效三桃實拜壽何辭百盞空
自幸晚爲門下士餘波應許丐奇窮

代同舍上黃相生辰三首

列宿東南夜有輝門弧此際誕英奇
晏嬰儉德人皆仰召虎中興日可期
名譽雅爲天下望孤忠自結聖君知
大椿會見千年算應許驚鳥託一枝

籍甚聲華振九州龍名未許潁川優
兩年鈇鉞扶黃屋

一品星躔尚黑頭
烜赫朝班聯棣萼
張皇軍勢擁貔貅
自慚東閣叨甄錄
願向清時與國謀

五月天恩解網羅
四方舉首願時和
我公寰海甘霖望
今日門闌瑞氣多
已幸羈窮蒙庇賴
竚看談笑却干戈
汾陽二十中書考
他日遙知數倍過



欽定四庫全書

集部

浮山集卷三

四

詳校官庶吉士臣柳邁祖

主事臣呂雲棟覆勘

謄錄貢生臣吳壽康

謄錄監生臣張曾壇

欽定四庫全書

浮山集卷三

宋 仲并 撰

五言排律

用孫仲益尚書韻二首呈孟信安

士仰韓門重身
高謝傳班文看輝
北斗人望起東山
絳灌庸奴爾臯夔
伯仲間自天芝
檢下指日袞衣還
片語鳴丹鳳羣爭
息左蠶時雖容下
客勝處一窺斑

慷慨安周鼎從容却郢兵
馳心子牟闕袖手闔閭城
前

著陳天陞先聲震敵營寰區望彌切樞筦寄非輕行有
絲綸詔寧終鷗鷺盟一舒經世策遐邇頌昇平

鄭漕生辰

象緯祥光動門弧瑞氣盈小陽春在序幾望月偏明他
日三千牘清時九萬程名因使粵重功自備吳成偉量
溟波濶奇詞錦段呈褒揚看唾玉輕重倚提衡松栢真
難老芝蘭足後生荀班行趣召金帶已先橫內史言何

美

謂鄭當時

尚書心自清

謂鄭崇

祇應南北相

謂鄭綱鄭餘慶

重振舊

家聲

唐大夫生辰

氣轉初寒候祥開既望辰應時來鸞鷟占夢獲麒麟盛
德圭無玷高才竹有筠曾襟藏巨壑人物妙洪鈞使者
光華遠朝廷寵數新鵬程九萬里椿幹八千春鼎鼐虛
前席風雲即要津黑頭紆袞繡天意在斯民

陳漕生辰代楊文作

六管陽初復前宵月尚圓長庚俄夢李崧岳故興宣國

使新恩數忠臣夙眷偏節龍開遠目衣繡聳華年日月
聲名起風雷號令傳自應威動岳魯是力回天相國關
中粟尚書地上錢委藏淹府庫飛輓亂車船南徠元歸
地西方正拓邊定知新將飽尤賴我公賢赫赫蘭臺舊
飄飄鳳沼僊終焉還魏闕聊爾駐荆川曲學聯珠履非
才汙彩牋千秋期鶴壽萬里附鵬騫

耿憲生辰

象緯祥光動門弧瑞氣纏秋來孤鶴健霜近古松堅鄰

境兵戈盡新恩雨露偏
輶車猶問俗寶帶獨優賢
投筆男兒志封侯烈士年
老成端可恃終冀勒燕然

五言絕句

對竹

嶽岑何處峯來伴蕭疎竹悠然方丈間
寄此千里目

假山

峯間碧琅玕清風五月寒
欲題無好語支枕卷簾看

七言絕句

官滿趨朝留滯吳門即事書懷十首

十載錢塘雲漢間江聲夢裏聽潺湲他山縱染千尋碧
不似西湖一帶山

水邊梅柳倍精神總趁晴天作好春多謝東君惜花意
不教風雨廢芳辰

小樓栽薛亂山橫獨倚朱欄度晚晴忽聽如簧語音好
祇緣高處最宜鶯

枉費花工著意催漫山桃李總非材要令千古芬香在

能作和羹自有梅

花逕風來百樣香捲簾春水綠池塘如今萬事銷磨盡
四卷楞伽味最長

春服何當詠舞雩鳳池今是魯真儒向令未解邊城戍
能對東風一笑無

錦帶吳鉤輕薄兒三三五五競花時太平樂事從誰得
費盡經綸爾不知

門外煙花看不厭東風故為客開簾如今樂極思疇昔

長是春深未解嚴

燕羽差池何處歸
銜恩春傍主人飛
定須借與一巢穩
十載飄零事事非

裁剪羣英荷化工
閒中無計答春風
自鋤花徑平如掌
要使荆榛一掃空

平江守禱晴即應時近元夕矣寄呈五絕句

丹邱雨裏看春回
密霧濃雲撥不開
恠底寒窓烘曉日
朱轡親禱梵宮來

投曉家家笑語聲
夜來風促雨如傾
都緣默禱曾中久
一瓣香熱喚得晴

梅經多雨玉飄零
就有殘枝困未醒
安得吳儂不歌舞
滿畦扶起麥青青

東風吹斷雨如繩
一夜仍開曲沼冰
便試元宵強半月
孰知天意欲催燈

安排燈火作鰲頭
人樂公來再有秋
轉雨作晴談笑事
他州誰得似吾州

夜抵德清縣偶題

溪山奪目壯哉縣風露侵肌老矣身斷岸橫舟偏得月
小橋曳杖不逢人

再過宜興舟中見芍藥數枝憶淮鄉此花之盛
為之悵然輒成三絕

故眼相看未作疎平生風味是吾廬娉娉裊裊誰家子
浪說傾城總不如

少時暮暮復朝朝一水相望恨未消岸曲橫舟試回首

隔簾斜立數妖嬈

却是溪頭消息真故園十載漫風塵如今不問黃樓子

淺白輕紅自可人

淮鄉芍藥號黃樓子者最勝邦人重之

薄暮遊潘登仕園園有堂三間榜曰一枝蓋湖

公樞密兩取莊周却說之語既以嘉潘亦以勉

潘之二子因用其意各賦一絕

斜窓短屋傍殘暉宴坐蕭然老布衣枯淡生涯一枝足

世間驚鵲誤南飛

玉樹郎君兩白眉
照人英爽自兒時
迺翁可笑太多事
繞舍春風千萬枝

蕪城

鶯歌燕語戲晴暉
日暮行人緩緩歸
十里蕪城春色晚
回頭往事已全非

有客來從陽羨聞
元績離家已月餘
由崑山過
臨安桐廬計今合歸矣
元績當不惜迂路一訪
僕於苔雪間也戲為一絕
招之元績純孝人每

在道念親殊切

風露侵人曷往哉
白雲飛處棹徘徊
平時識面盡經過
莫為茅簷偏不來

感時

傷春那得易為情
世味年來一一更
馳馬彎弓今日事
儒冠深覺誤平生

忽傳羣盜下淮瀕
又逐黃州韓使君
却望長安在天上
愁看天際有孤雲

晚坐和韻

急雪逢春易作晴
窮閭猶復斷人行
公家何在欲乘月
夜半扁舟不隔城

好月侵堦已十分
太清不受一塵昏
今宵定自梅花發
踈影橫斜何處村

篇篇振玉妙玲瓏
字字春風和氣中
安得居家無一事
搜吟日日與君同

醉眼全醒病亦醒
虛齋危坐聽無聲
錦囊欲報清新句

自笑常談只老生

城東韓李城南趙欲往從之道阻長與

去聲

我詩盟煩借

問角弓永好願無忘

次韻病起二首

不妨佳句太頻頻還得愁中眼漸明好是維摩病初醒
又將口業起紛爭

聞道車書未一家平時苦苦念京華新來忽得幽居味
竹屋茅簷政自嘉

送閻少隱同其弟伯子宣子赴試淮南為一月之別某以病起不及餞送為三絕

二難晚出材無敵老將從來勇冠軍一月望公三捷至秋風不惜暫離羣

街頭日夜催槐黃去去歸帆如許忙我病公行欠卮酒少遲飲至共傳觴

扛鼎拔山誰長雄八十號數誇江東公家子弟又可用要與父兄成大功

題章伯深臞怪圖

竹戶茅簷一逕斜
清樽黃卷定生涯
溪山勝處春長在
却放朱藤一半花

杖策山隈亦水濱
閒中未害飽經綸
何曾寂寞嵌巖裏
慣著風流廊廟人

畫枯木

乞與空齋伴我閒
風霜諳盡各蒼顏
不妨黛色凌雲幹
蟠屈生綃尋尺間

次韻耿薦可催菊三首

黃花應自惜離披欲放清香故故遲
病客高眠防不肯
賸裁好語報花知

銜杯采菊久尋醫
白髮蒼顏漸可期
準擬新來強作意
又從愁裏過花時

年來花意亦難猜
陶令東籬獨未開
伴賦落英吾豈敢
狂言聊復為君催

黃兵部生辰

中朝人物競推先富貴前途看永年九萬里程飛正遠
八千春幹久彌堅

南國初持使節回斑衣仍把錦新裁大椿更向萱堂祝
長到春來共壽杯

蚤歲蜚聲應宿郎至今雞舌尚含香未應駟馬誇流俗
只為慈親樂故鄉

地上泉流府庫充艱難天與歲時豐他時若論關中漕
合數蕭何第一功

詩餘

憶王孫

秋閨

庭梧葉密未驚秋風雨瀟瀟特地愁
愁緒如絲無盡頭
思悠悠悵望王孫空倚樓

點絳脣

贈外孫猷

秀出羣兒柳眉濯濯春庭院不親歌扇
弄筆勤書篆

翁已無能老退慙頰面欣同宴坐來喜見
痛飲驚無算

浣溪沙

春閨即事

淡蕩春光寒食天
玉爐沉水裊殘煙
夢回繡枕隱花鈿
海燕未來人鬪草
江梅初過柳生煙
黃昏踈雨濕鞦韆

前調

示孟氏女

舉案家風未肯低
清心端自秀深閨
芝蘭玉樹寧馨兒
蚤歲女禪靈照女
靜中經卷手常携
聲名要與斷機齊

又

雅稱詩人美孟都清新幽韻比來無新來學得繡工夫
經卷但知從阿母醉來翁已要人扶尚能把盞勸屠

蘇

前調

和李達
才韻

說似當年老季倫君家雖富客常貧何曾一笑任吾真
酒滿罷留天下士詞新空賦坐中春誰能絕筆更書

麟

菩薩蠻

和趙有逸
坐上韻

宛如姑射人冰雪知公不負佳風月莫放漏聲殘清風
生坐間賞春心未足翦盡尊前燭此樂自難忘一觴
還一觴

好事近

宴客七首時留平江
俾侍兒歌以侑觴

二陸起雲間千載風流人物未似一門三鳳向層霄聯
翼貞元朝士苦無多公今未華髮重向紫宸朝路立

鵷鷺前列

右朱
叅議

今古滿胷中韜畧一時人傑高臥谿山好處遲十年齋

鉞 朱輜休傍武陵溪梅花記曾別蚤晚殿前歸侍總

周廬千列

右劉
鼎州

淮上五分符名在圖書東壁坐對書成多暇寫青箱千

帙 一杯先為祝東風丹詔來朝夕何處稱公揮翰定

北扉西掖

右鄭
直閣

閱閱盛中州冠冕共推華族耐久松筠交契更襟懷金

玉 諸儒皆自愧廬前小試暫符竹行看世官入踐繼

西樞前躅

右廬
楚州

分手又三秋猶記花時歌別每念征帆歸晚誤五湖風

月清江休望使君來指日趨天闕堦玉翁冰相映看

紫薇花發

右朱
臨江

襟韻絕纖塵炯炯夜光明月合是紫荷持素侍丹墀清

切暗香疎影想公家人與梅超絕酒罷帝城蚤去占

百花先發

右林
刪定

今雨幾人來冰霰更凝寒色門外車多長者頻光生蓬

革續紛飛雪更初梅特特為留客惟恨坐無華饌只

平時真率

憶秦娥

木樨

隈巖側恠生小院香來別香來別嫩黃細細商量齊發
佳人斂笑貪先折重新為翦斜斜葉斜斜葉釵頭常
帶一秋風月

畫堂春

和秦少游韻

春波淺碧漲方池池臺深鎖煙霏緩歌爭勝早鶯啼客
忍輕歸合坐香凝宿霧墊巾梅插寒枝漸西蟾影漾

餘輝醉倒誰知

大聖樂令

贈小妓

豈翫梢頭春正早
顰修眉未經重掃
湖山清遠幾年牢
落風韻初好
慢綰垂螺最嬌小
是誰家舞腰裊裊而
今莫謂春歸等閒分付芳草

浪淘沙

贈妓

趁拍舞初筵
柳裊春煙街頭桃李莫爭妍
家本鳳樓高處住
錦瑟華年不用抹繁絃
歌韻天然天教獨立百

花前但願人如樓上月三五團圓

又

傾國與傾城裊裊盈盈歌喉巧作斷腸聲看盡風光花
不語却是多情家近董雙成三妙齊名誰教蜂蝶漫
經營留取無雙風味在真是瓊英

前調

事即

草聖與詩餘清韻誰如生綃團扇倩誰書月湛素華天
似水深院涼初人散晚鐘踈後約還虛良宵忍放枕

鸞孤要得相逢除是夢有夢來無

鷓鴣天

為鮑子山侍
妾燕燕作

小泊橫塘日欲斜一枝猶有未殘花幾年燕子無消息
今日飛來王謝家歌水調韻琵琶聲聲都是怨年華
釵頭杏子今如許翦燭裁詩莫問他

前調

贈外
孫夔

問世麒麟降自天光輝列宿燦初躔他年身致夔龍列
少日心存翰墨邊簪綵筆照金蓮詞華當使思如泉

未論聳壑昂霄事且與衰翁慰暮年

驀山溪

有贈

冰清玉映自是閨房秀十里捲朱簾好紫陌家家未有
天然情素高壓一城春花艷麗日精神梅韻腰肢瘦
曲屏虛幌枉著鴛鴦繡不是不相逢淚空滴年年別袖
從他蘭菊秋露與春風終不似玉人人一片心長久

水調歌頭

趙制置見招歸用東坡中秋韻以見微意

華棟一何麗移下小壺天幾多曲房新戶縹緲似當年

曾是使君風度元有曾中邱壑六月竹風寒一洗箏笛
耳歌舞繁筵間座中客醒復醉聽無眠已田歸夢猶
復嫋嫋記清圓尚想飲中僊子來處餘香飄座勝韻此
雙全為寄月華語難與並嬋娟

芰荷香

中秋在毘陵不見月作數語未成
後一日來澄江途中先寄趙智夫

醉凝眸正行雲遮斷澄練江頭皓月今宵何處不管中
秋朱闌倚遍又微雨催下危樓秋風空響更籌不將好
夢吹過南州浮遠軒窓異日到山空雲淨江遠天浮

別去客懷無賴準擬開愁冰輪好在解隨我天際歸舟
何須舞袂歌喉一觴一詠談笑風流

八聲甘州

木樨
和韻

正西山雨過弄晴景竹屋貫斜暉問誰將千斛霏瑛落
屑吹上花枝風外青鞋未熟鼻觀已先知撓損江南客
詩面難肥兩句林邊傾蓋笑化工開落尤甚兒嬉歎
額黃人去還是隔年期渺飛魂憑誰招取賴故人沉水
煮花菱猶堪待嶺梅開後一戰雄雌

念奴嬌

冬至
夜作

灰飛懈竹慶羣陰消盡新陽來復雲物呈祥連瑞靄煙
氣紛紛馥馥紫陌香衢朱簷影裏羅綺花成簇嶺梅驚
暖數枝爭綻寒玉有人裊裊盈盈今朝特地為我新
粧束嬌倚銀床添繡線長喜修眉舒綠不道多情錦屏
羅幌難得歡生足誰知今夜玉壺銀漏偷促

前調

和耿時舉
賦雪韻

江南春早尚餘寒門巷楊花飄逐一色初梅開盡也不

數芳園紅綠珍重騷人幽懷分寄高韻歌黃竹六花羞
避滿牋凌亂瓊玉應念有客長安履穿東郭無與憐
窮獨鼓櫂前溪非興盡寒怯水棲巖宿咫尺君家瑤田
無徑冰柱排銀屋瓊頭春到喚回晚夢清熟

前調

王守
生辰

金縢事業慶丹青千載勲在王室聖主英明平萬國天
產非常人物嶽瀆分靈熊羆符夢五百年方出致君堯
舜要須純用經術須信鳳閣仙人風流文采藹家聲

如昔獻納司存持禁素合歷三臺清秩倦宿承明乞麾
臨郡暫綴金閨直五雲深處一星今在南極

瑞鶴仙

春日
詠懷

試六花院落正柳綿飄墜因風無著吳王舊城郭記烏
衣門巷小橋簾幕他州寥索漫等閒桃英杏萼認幽香
來處羣芳盡掩蕙心先覺行樂燕雛鶯友浪語狂歌
休休莫莫蘭房繡幄添新恨念前約殢十分芳景十分
春意休惜十分共酌任十分吹老寒梅戍樓畫角

水調歌頭

浮遠堂

靜練平千頃，華棟俯中流。凌晨畫戟，來看宿雨斷虹收。
八九胷中雲夢，三千筆端風月，無處快凝眸。笑詠一堂
上，揮麈氣橫秋。俯危欄，紅日下，暮雲稠。無窮偉觀，祇
應天意為君謀。容我時醒時醉，獨泛微煙微雨，浩蕩逐
輕鷗。不羨岳陽勝，丹碧聳層樓。

念奴嬌

同上

練江風靜，卧冰奩百尺，朱欄飛入。江遠浮天天在水，水

滿半天雲濕白鳥明邊青山斷處眼冷江頭立月明潮
上葦間漁唱聲急幾度吹老蘋花野香無數欲寄應
難及天借詩人供醉眼尊俎一時收拾竹裏行厨花間
步障風雨生呼吸酒闌歌罷釣船先具蓑笠

